

Railway High School kum 65 ajungba benjung amung



Dimapur, May 12, 2017: Hokolbarnü Railway High School, Dimapur kum 65 ajungba benjungmung sentong nung School Education & SCERT Minister, Yitachu aser Hojai, Assam, MLA Shiladitya Dev nati souvenir sayatsüba noksa nung angur. Kasa noksa nungsa tongtibatang nisungtema kar angur.

Dimapur, May 12 (TYO): Dimapur nung school tejentem rongnung ka, Railway High School, Dimapur Hokolbarnü kum 65 ajungba benjungmung mungogo, aser iba sentong nung tongti tesemdangjeri School Education & SCERT Minister, Yitachu aser tetushi tejaokerji, Hojai, Assam, MLA Shiladitya Dev liasü.

Iba school ya Railway department-i ketdangser.

Iba school nung kaketshir 1,000 dak tema tenung zuluoka tenzüka liasü, aser school nungi tongtibatang nisung aika adokogo. Ajisüaka tim ketdangsertemi sendoka

yutsüba ajanga tanübo school nung kaketshirtem kanga ajema kumogo.

Iba school timtem angateta minister-i, iba school ketdangsubaren osang angazüka mepelar, iba school ajungketsü atema management aser tim ketdangser tsungda amalitepa inyaksüla, ta metetdaksü.

Paisa, iba onükji pai temaba ketdangsertem dena jembitsü; ibaji ajanga telok (tamangba telok) ka nungi dang masü saka tanga teloktem nungia kaketshirtema atsüer arutettsü, ta metetdaksü.

Paisa tesayurtem dang nendaka inyaksü aser lenla

ajak nung lokti terenlok atema shilem agitsü ajungshi.

Iba school ya akhidang ama tanaben asentenshitsu imlar, ta paisa shisem.

MLA, Dev-ia tang iba jenjang tashi school anir arutetba atema iba school mezung tenzükerkem nem tenungsang agütsüba den külemi tesayurtem danga pelaba lemsatop.

Paisa iba school terenlok atema temaba ketdangsertem den jembitsü, ta metetdaksü.

Ano Muslim Council Dimapur-i sensaker kaketshirtem atema school uniform 10 tenla agüja liasü.

Mokokchung DC-i metetdaksür

Mokokchung, May 12 (TYO): Tanü Mokokchung Deputy Commissioner, Sushil Kumar Patel IAS-i sangdong ka ajanga, D.B -II/Driver/House Keeper mapa atema tenung agüja alirtemi May 16 nungi anüngdang 11:00 ako nungi nikongdang 3:00 ako tsungda Establishment Branch, DC's Office, Mokokchung nung Exam fee sen 50/- agütsür calling letter agizüksü metetdaksüogo.

Yaongyimsen Students Union-i ayonga career workshop ka agi

Dimapur, May 12 (TYO): Kaketshirtem dang mapa balala indang len tuyutsü nükjidong nung Hokolbarnü Generation Countdown Youth Ministry centre, Sovima nung Yaongyimsen Students Union-i ayongzüka 'career opportunities- current trends' workshop ka agiogo.

Iba sentong nung mapa balala maangka metetdakja lenla balala nungi shisalen sayurtemi kaketshirtem den jembia liasü.

Shisalen sayurtemisa information technology, skill

development aser entrepreneurship indang junga metetdakja liasü.

Iba workshop nung kaketshir 100 dak tema aden.

Shisalen sayurtemji: Alemtemshi Jamir (IAS) Retd chief secretary of Nagaland, Kelhousuetuo Nakhro, Deputy Secretary, NPSC, Er. L Lanuwabang, Director, NIELIT, Kohima, Lezo Putsure, Director, YouthNet, Nishit Dholabhai, Rozelle Meru aser Dr. Yan Murry nung liasü.

Mkg nung GST indang tesayuba...

(TAPAK 1 NUNGI...)



Tongti tesemdangjeri (Achiji nungi abelen) Mokokchung D.C, Sushil Kumar Patel, Shisalen sayur Chubano, Zulutemsu Lkr aser Sanjeet Kumar IRS nungertemi jembiba yangi noksa nung angur. (Mokokchung, May 12, 2017)

State sorkari office ajak nung Tax Services Centres amenokogo, item centre-tenji tax agütsüba maparen nung angati amshitettsü, ta paisa shisem.

Tang India nung tax aika lir, tatishitsü agi VAT, service tax, excise duty, entry tax, purchase tax, luxury tax ym. saka kodang GST ya mapa kümdir, linük

ajunga nung goods and services tax agütsüba inyakyimji ka dang akümtsü. Iba ya kodang mapa kümdir yangi tajangzüka aika dang sentaka lir aser iba ya India nung otsüsütsü ka asütsü, anungji, iba inyakyim tasenba ya Nagaland nunga takok angutsü ajaki merangtsüla, ta shisalen sayur kati ayongzüka ashi.

Sentong nung shisalen sayur; Sanjeet Kumar IRS (Asst. Commissioner, Central Excise & Service Tax Shillong), Zulutemsü Lkr (Superintendent of Taxes), Chubano (Superintendent of Taxes) par aseme GST dak sentakba onük balala nung power point presentation agütsü.

Signal Angami nung Aor senden alitsü

Dimapur, May 12 (TYO) : Dimapur nung Signal Angami yimtak Aor Telongjem Signal Angami Dimapur lokti senden May 13, 2017 anepdang 10:00 ako nungi tenzüka ATSAD kimen Wb.Temsjungba'er kidang alitsü sentong renema lir. Iba sentong nung Wb. Limameren (Rtd. Director)

aser ASTD tir Wb.Supu Jamir nati tajungshi o jembitsü aser Village Council member Wb.Sashinüngsangi tepela o ashitsü.

Iba senden nung Signal Angami, Dimapur nung alir Aor süngpu nungi bati tashi ajak adentsüla, ta ketdangpurtemi ozüngsüa metetdaksüogo.

C-Edge College Wi-Fi Campus ka kumogo

Dimapur, May 12 (TYO): Tanü C-Edge College, Dimapur nung JIO Wi-Fi connection agia Wi-Fi campus ka kumogo.

Assistant Prof., Wapangla Imchen-i okila jembia liasü aser Assistant Prof., Limongi Khuvung-i sarasadema liasü.

Iba sentong nung tetushi tejaoker, Lead HNI (High Network Individual) North East JIO Guwahati, Saranga Patowary-i college nung Wi-Fi campus semzüksü.

Iba sentong nung jembidang pai, India nung sorkar school aser college tem nung internet conection agitsütsüji Mukesh Ambani mangdang lir, ta

metetdaksü. Paisa, angati Wi-Fi connection atema shimba college ishika rongnung C-Edge College densemogo, ta metetdaksü.

College Tir, Er. Moa Aier-i Jio team dang college atema mapa tajung inyakja Wi-Fi campus ka kümdaksüba atema pelaba lemsatop.

Iba sentong nung kaketshirtem, tesayurtem aser JIO team züngsem kar dena liasü. Sentong nung shisalen sayur, Manager JIO Nagaland, George Murry-i anir shisalemsatopba sentong ka agia iba sentong tembanga liasü.



Dimapur, May 12, 2017: Hokolbarnü Asian Mission Institute Dimapur Branch, Nagaland nung World International Nurses Day amungdang tangokba noksa ka angur. Iba sentong nung tongti tesemdangjeri Chairman of Indigenous Minority Tribes of Nagaland, Advocate Lun Tunlung liasü. Kasa sentong nungsa Administrator NMHRC, Dr. Chubakumzuk Longchar-ia "Nursing: The balance of mind, body and spirit" omen nung ajemdaker jembia. Ano City Law College Principal, P. Leonard Aier aser Secretary General NEIMUN, L. Limaienla Aier nati nursing kaketshirtem den jembia liasü.

ABAM CE sentong Yimten Yimsusur... (TAPAK 1 NUNGI...)

Tongtibatang kaji, asenok tang aliba tia agibo asenok kodanga nüji makümtsü aser nisung shiai ni Khristan tajung ta nübur dang mesayutet tashi clean election ji takok mangutsü, kechiaser iba mapa ya tangatetba agi inyakba mapa ta shisema liasü.

Tayongzüka kaji, Yisu asen menen atema Kangki nung metaba mapang auersang aser noklang madak kibur tenati Yisu metenja jembiba asoshi shingaia tena memerenshi, kechiaser ibaji Tsüngrem tsüngdang Ochi liasü; tanü Tsüngrem tenung nung asen ajangzüksü asoshi mesü alima ajungtsü asoshi Ochi jembia aibelener metongshitsüdi, kechiaser Ochi asoshi shingaia asen maitsütsü aser memerenshitsu anungji, Khristan tajung ka ama ochishia rongsen nem asen manishidaksüi Tsüngrem metetba nisung shimdi, ta ayongzüka.

Olemsatop mapang senso candidate ya joko malitsüla aser

shimokisa iba mapa inyakdir ozüng nung aketba ama tejak mereprangi tapet temerenshi agütsütsüsa inyaksüla aser ano lokti tenteter talisa self help group mesükba lokti ajanga candidate dang sen meshiba anentsüla ta sensaksama liasü.

NBCC ajanga Clean Election dak sendakba mapa nung koba tetuyuba agütsüdir Tsüngrem nuken tsüboa Arogotemi tasüita ochishia inyakdi, ta tenoktenoka jembia liasü.

Ano Election nung tokteptsü nisungtemji shiba aser tebilemba kechi aji meteta shimtsü asoshi sabang tajung agütsüba dak alaka campaign tabotabo mapang balala nung yimtsüngi arua magidaksütsüla ta sensak asem. Arogo aser Yimten maneni teka amteper asen lima Election dak aketba temenen mapa samadaksütsü ajungshitepa liasü. Maneni lokti ajaki iba mapa nung kija khuret ama bilema ABAM den yariteptsü nukla tulu ayur.

OFFICE OF THE AO STUDENTS' CONFERENCE (AKM) FELICITATION

The Ao Students' Conference (AKM) took immense joy and pride to congratulate our dear students who have through their hard work and dedication have achieved state top ranking in HSLC and HSSLC examination 2017 and brought laurels to our Ao community

HSLC toppers

Sl. No.	Name	School	Position
1.	Moamanen Jamir	Fernwood School, Kohima	10 (a)
2.	Limatula Imchen	St. Paul Hr. sec. School Dimapur	12 (b)
3.	T. Sentolilla Lemtor	Holy Cross Hr. Sec. School Dimapur	13
4.	Nokinsangla T Imchen	Edith Douglas Hr. Sec. School Mokokchung	14 (b)
5.	Temjeninla Jamir	Northfield Kikha	16 (d)
6.	Zuiner Jamir	St. John Hr. Sec. Residential School Dimapur	18 (c)
7.	Longsener Longkumer	Libemo Memorial School Wokha	19 (e)
8.	Okten Jamir	Queen Mary Hr. Sec. Schol Mokokchung	20 (b)

HSSLC Science Stream

Sl. No.	Name	School	Position
1	Imlilong Jamir	Holy Cross Hr. Sec. School Dimapur	5
2	Loktinen	Pranab Vidyapith Hr. Sec. School Dimapur	6
3	Noktichung B. Ozukum	St. John Hr. Sec. Residential School Dimapur	10

HSSLC Arts Stream

Sl. No.	Name	School	Position
1.	Lanukaba	Christian Hr. Sec. School Dimapur	5

Further, the Ao Students' Conference (AKM) congratulates all the subject toppers and all the successful students who have passed out HSLC and HSSLC examination 2017 with flying colours.

Sd/-

Imkongwati

President, Ao Students' Conference

Sd/-

Impoksula

Education Secretary, Ao Students' Conference

Assam sorkari 'Act East' department tenzüksü: Sonowal



Guwahati, May 12 (Agencies): Brihostibarnü Assam Chief Minister, Sarbananda Sonowal-i, state sorkari 'Act East' department ka tentettsü, koba ajanga Centre-i benokba Act East Policy mapatong ajungkettsütsü, ta metetdaksü. "Ato kilonseri South East Asia den Northeast sendakteptsü mangdang yur tenzükba mapatong inyaktüsü atema ozü sorkari 'Act East' department tentettsü," ta Sonowal-i ashi.

State sorkari 'Ease of Doing Business' policy bo tenzükogo aser onoki asen linük densema alima tesem balala nungi

investors ayongdentsü, koba ajanga Northeast tesem ya South East Asia leni aotsü atema rongsenkettsüng kikümbang asütsü, ta paisa metetdaksü.

Facebook-i state sorkar den sentepa ayongba 'Boost your Business' sentong nung jembidang Chief Minister-i, "Yangi inyaktüsü atema investor nem maangka agüja Assam sorkarisa Global business centre ana amenoktsü sentong yangludar," ta ashi.

Sonowal-isa, alima ya yimtsüng ka mesüka kümogo, anungji lanurtemi mera agia north east tesem nung inyaktettsü mapatem bushitsüla

aser ali nungi adokba rongsen tajungtiba agi amshitsü atema inyaktüsü, ta ashi.

Iba sorkari Assam jenjang tajungba akumtsü atema inyaker, aser 'Skill India', 'Make in India' aser 'Start up India' mapatongtem ajanga lanurtem aser entrepreneurs nem tashi agütsütsü, ta paisa metetdaksü.

"Facebook indang Boost Your Business mapatong ajanga asen sentongtem tajungba akumtsü," ta Chief Minister-isa shisem.

Kasa sentong nungsa Head of Programs for Facebook India, Ritesh Mehta-ia, 'Boost Your Business' mapatong ajanga local shishilembartem nem training agüja digital mapatong ajungkettsütsü, iba den külemi online ajanga shishilembaba ajanga rongsenkettsüng jenjang tajungba akumtsü, ta ashi.

Alima nung small & medium businesses indang Facebook pages million 65 tashi lir, aser India nung Facebook amshir shilem 57 bo shishilembaba tilateri ka nungbosa sendaktepa lir, ta paisa shisem.

Mizoram nung maneni Congress-i sorkar akümstsü: Lal Thanhawla

Aizawl, May 12 (Agencies): 2018 state assembly elections nung Congress-i takok angutsü ta Mizoram Chief Minister, Lal Thanhawla-i Brihostibarnü metetdaksü.

Congress Bhavan nung party züngsemtem den jembidang Lal Thanhawla-i, "Party shingaiia kümsük asemen atongtepa sorkar ketdangsüa maru, saka 2018 elections sülen Congress-i ibaji atalokdaksütsü," ta ashi.

May 4 nü Mara Autonomous District Council election nung Congress-i takok tulu anguba ajanga ibaji jungkai adoka sayur, ta paisa shisem.

Menden 25 indang MADC elections nung Congress-i menden 17 nung takok angu aser opposition Mizo National

front o Mara Democratic Front senteper menden 7 nungdang takok nguteta liasü. Menden ka nung Independent candidate-i takok angu.

Mizoram nung 1989 küm Lal Thanhawla-i taoba chief minister Laldenga-i aniba MNF madak takok angu aser külen 1993 nunga maneni takok angu.

1998 elections nung Zoramthanga-i anir MNF-i Congress madak takok angu aser parnokisa 2003 nunga takok angu, saka 2008 aser 2013 elections nung Congress-i dang takok ngua sorkar ketdangsüa arur.

2013 state assembly elections nungbo Congress-i menden 40 nungi 34 nung takok nguteta liasü.



Shillong (Meghalaya), May 12, 2017: Meghalaya nung security sepaitemi telungpurtem anema tesashiba mita aoba ajanga tanü Tura nung GNLA züngsem kabo pasasa BSF sepaitem matsüngdangi aruba noksa nung angur. GNLA züngsem, Marus Ch. Sangma-i, 2012 küm pa ANVC-B nung adenba sülen Bangladesh nung ita asem tashi training agia liasü ta nangzük.

ULFA teloki lanurtem shimoker: DGP

Tezpur, May 12 (Agencies): Tang ozüng agi anentsür aliba telok, ULFA-I-i Assam tesem balala nungi lanurtem anioker, ta Assam Director General of Police, Mukesh Sahay-i Hokolbarnü ashi.

"Tang tashi ULFA-I ajanga Assam nung tesem balala nungi lanurtem iba telok nung adentsü asoshi shimer aser iba telok Commander-in-Chief, Paresh Baruah-i iba mapa ya Myanmar nungi inyaker," ta Army 4 Crops Headquarter nung 'high-level' mitkartem senden ka amenba sülen osangbenertem den jembidang Mukesh Sahay-i ashi.

Tanga telungpurtem nokdangtsü atema maparen balala inyakba indang jembidang, "National Democratic Front of Bodoland (Songbijit) anema Sonitpur district aser Assam ajunga nung mita bushi tenzükogo," ta pai shisem.

Ato Kilonser, Narendra Modi taruba ita Assam semdangtsü lir aser iba mapang matong tsüngda state nung telungpurtem merüktettsü maparen tesashiba tenzükogo, ta police ketdangserisa ashi.

"Bangladesh nung Jamatul Mujahaddin telungpur anema mita bushi tenzükba sülen state

nung ULFA-I aser NDFB-S ajanga timtem agütsütsü merangtsü. Mitkartemi iba maparen kanga süoki ia repranger, aser hopta ana tsüngda Guwahati telongzük yimdong nung CCTV camera inoktsü," ta DGP-isa ashi.

Mitkar tashi maitba ajanga May 9-nü Guwahati nung aliba M P Jewellers nungi ashiauer temi hon agi yangluba naro aser azük seret 7 nungi 8 tsüngda auyar ao, ta paisa shisem.

"Sorkar mapa inyaktertem nem parnok dang temaba jenjang nung aliba ketdangsertemi timtem agüja aser parnok temeden agientsüra iba tejashi social media nung meprokshii kü nem mesüra DGP nem metetdaksütsüla," ta Chief Secretary, V K Pipersenia-i osangbener den jembidang ashi.

May 26, 2017 nü Ato Kilonser, Narendra Modi-i state semdangba mapang telungpurtemi timtem agütsütsü südi ta temolung melemtetba ajanga iba senden ya amen.

Kasa senden nungsa Assam, Arunachal Pradesh aser Nagaland arrtsü ken o atema jembio, ta ketdangser osang ka ajanga ashi.



Itanagar (Arunachal Pradesh), May 12, 2017: May 11, 2017 nü Arunachal, Siang district kübok Kerang yimdok ki rongdokba noksa nung angur. Osangbenertemi ashiba agi, iba mi lendong nung ki 28 tashi rongdok, ajsüka nisung asüamaba mesüra yiruba osangbo mali.



TIR YIMYIM YIMOBILEM (EDITORIAL)

DIMAPUR SATURDAY, MAY 13, 2017

PROXY LIMA !

Proxt tetezü tangar melena inyakba. Atangji, tangar melena inyakbaji yimten tashi kati temelaba agütsür inyakba süra, ibajibo ozüng raksaba mapa ka masü anungji tai masütsü. Ajisüaka, Nagaland nung proxy otsü jembiba yabo meteta aser memeteti ozüng raksaba mapa inyakba indang jembir. Aji oda, proxy ta kodang jembidir, jet ta asenok mulungjangi election agiba anogo nung tangar tenüng nung vote enoktsüba indang arur. Tangar asoshibo aji tai aser taaktsüka saka asenokbo yimya sübadoker, joko taiang shitak aser shitakang tai amato bilemer. Iba amaji shitak agi tai amato aküm aser tai mapatemang shitak amato inyaker ta Nagaland ya asenoki proxy state ka kümdaktsüogo. Aji oda, election nung karbo tangar tenüng nung terben-metsüben tashi vote enoktsüba lir. Item jagi tangari meinyaktetba mapa tajung tuluka inyaktet amato kanga nümadanga jembir. Item nisung asoshi vote agütsüba anogo ya sen aaba anogo tajung ka ama bilema ozüng raksaba mapa nümadangdanga inyaker. Ibayongji, asenoki sen meyirijang ishika angutsü mechi asen lima raksayonga kecha apayua mebilemer. Aji oda, tang tashi nung asenoki asen lima agi asenok nümedangtettsüsa alibaji proxy vote agi yimsüsür shimba aser proxy vote agi government akümba ajanga lir. Proxy vote tetezü proxy election aser proxy election agiba ajanga anguba takoksatemji proxy gari lenmang, proxy mozü ki, proxy school ki, proxy lu, proxy government office-tem asütsü. Iba proxy tia nungi asenok shitakba nüchi dangi arua proxy nisung masü saka shitakba senso tajung ka akümstüla. Atangji, proxy ya election mapang enoktsüba proxy vote dangbo masü saka Nagaland tasüng proxy tesayur aser proxy mapa inyaktertem lir. Tazüngbo shitakba nisung ka azüng saka teinyakerbo tangar ka inyaker. Mapabo nisung ka angur saka teinyaksang aser teinyaklajibo tangar ka. Aji oda, shitakba shimba nisung melen proxy tesayurtemi sayuba HSLC aser HSSLC result-ji majungtsü. Iba amaji mapa angusang tenüng balaka saka teinyaksang balaka aser ano ita sen agizüksangbo balaka ta Nagaland nung proxy inyakba mapa ya tamamangtsüka lir. Aji oda, mozü kidang inyakertema proxy doctor aser proxy nurse lira, ibajibo lendong tulu, anungji tetsübuttsüka. Ashiko, Nagaland nungbo mozü kidanga proxy doctor aser proxy nurse-tema alitsüa akok. Aji oda, proxy vote agi election agia government akümba sülen school nung proxy tesayurtem nem sayudaktsü, proxy nisung nem shirangertema anepaludaktsü aser proxy nisungtem dang office nunga mendaktsü. Iba amaji government nungi anguba teyaritem shitakba kaketshir, lanur, sensaker-mekokmeiner, yimtaklir, aluyimer aser shirangertem masü saka proxy kaketshir, proxy lanur, proxy sensaker, proxy yimtaklir, proxy aluyimer aser proxy shirangertem nem dang agütsüba ajanga shitakba teyari angutsü purtembo mangu Nagaland tebilemstü agi sünga lir. Atangji, Nagaland ya proxy lima dang masü saka "Bogus lima" ta ajatsü akok, kechiyong tiyazü nisungtem tenüng nung ita sen achir, pension agir aser teyari tapu balala agirtem agi Nagaland sünga lir. Item ochimashi teyari jagi ishika jangratema alir aser aika timtemdaktsür. Kopika, yamai shitakba Nagaland meyanglutet, Proxy aser Bogus Naga lima nung alitsü ? Kopika ozüng raksaba mapatemang shitak aser ozüng kübok alibabo tai amato asenok alitsü ? Kopika Proxy aser Bogus mapatem agi nübortem tejakleni moudaktsüi soittsü ? Nagaland meimra proxy vote enoktsüba yimya aser bogus inyakyim mapatem ajak anentsüla. Aji oda, Nagaland ya proxy lima masü saka teindang aser ochishir agi koka aliba lima ka asütsüla. Asenoki proxy vote enoktsü tashi , proxy school aser mozü ki anepalu tashi, bogus tenüng nung tajangzük agi tashi, asen lima ya proxy lima aser bogus lima asütsü. Asenok aliba Naga lima ya asenok meyong masü saka tarutsü chirnur aser semchirsemnurtem meyong lir, anungji parnok asoshi proxy lima aser bogus lima kabo asenoki senmang küma yanglua medoktsütsüla.

OLEMSABANG

SUBONGNUKLU MONGSENYIMTI

- Mrs. Meyisongla, Retd Dy Director Nursing Kohima

(Taoba adok nungi...)

AO MILEN TENZUKBA OTSU:-

Tsüngremi Mr. Sübongnuklu nem tarutsü mangdang tulu agütsü. Pa molung nung teti bilembaji Ao oshi nung Aotsür Aor rongnung osangtsüsang agi yakta tongteprateptsü kanga yongya. Anungji pa Dacaa nung alidang Bengal Gazettee, Statesman, Jugender (Bengali oshi) aser Tapti Assam News paper tejentem bendena bener aru. Asembuba Ao Students' conference Waromong nung akadang 1932 küm iba mongdang akatsü ita ana jelia lia sodi agir aru. Mongsenyimti nungi Mopungchuket aser Khar ajanga tetsüng agi Changki-i pa medemer Longritangchetba ajurutsü December 28, 1932 pa apusoa alu. Temenungratsüka rucksack tejen ka nung Newspapesr tejen ishika, Halfpant ka, tula tejen ka, towel ka, ano sapon tagitoh ka ta bener alu. Kanga menurang Changki atong aser pa medemer Longritangchetba ajurua, papertemji ka ken,ka ken ta lushia sayu. Oda asen lima osang kaket kabosa adoktsü ta shia tena 29.12.32 anepdang Waromongi alu. Idangji Longridangchetba mendenbuba liasü. Anungji mezüng sentep nung iba indang süoka jembir. Saka parnok rongnung opangmapu adok. Osangkaket ka adoktsuji-British nungeri memelatsü. Kari ashir, ano iba osangji kechi osangsa asütsü. Shibai menüngtsü ? Kong menüngtsü ? Iba menüngtsü senji kong nungi angutsü ? Kari ashir, British nunger Ao Students' Conference shipangtsütsü. Item ajak atema kanga shisabulutepa jembir. Kodang Longridangchetbai papertemji ka ken. ka ken ta lushia sayu mongdang nunger ajaki jungabo bilem. Saka majungtsu ta jembia sentepji shipang. Idangji Sübongnuklu molungjang nung retreta bilema tejak mesangwai aküm. Kidangi orr pai mendenpur par pezujü (4) pa anendaki aja. Parnokji Longritangchetba, Ajangto, Sosangchiba aser Nokdenlemba parnok den tezü medangi jembir. Parnoki ashi, ajak angatetogo kanga junger, osangji adoktsü ta lemtet. Iba osang kaket dang "Ao MESSENGER" ta ajatsüla ta P.R Wicksteant, (American missionary) ashiba jar küm ka aru. Tamasa January 28, 1933 küm adok. Ibai Nagaland aser North East nung mezüng adokba osangkaketji liasü. Ao students mungdang Impur nung amongdang AO MILEN ta melenshi aser yamaji tanü tashi amshia arur. Iba paper ajanga Aor ajak sangwatsüdagü.

Taoba Ao milen yimozülur T.Senkai Sübongnuklu dang yamai asüngdang, " Oku, osangkaket adoktsü nai yamai jangraba ya koma sür shisatet ? Idangji pai yamai langzu, "Ni Dacaa Engg school nung azüngdang Bengali oshi agi züluba osangkaket nung India nüchiso anguba indang osang sangdong. Idakji nuburtem ajak külemi tejakleni aotsü, anema alitsu, mapa meranga inyaktsü aser kaket shisatsü nung tangar menepa renloktsü indang züluba azüngdang kü molungjang nung kanga kongshi aser ajongmeso, aser ni kanga jangradaktsü. Ni bilem Aor/Naga nunger yamai osangkaket ka adoker nüburtem nem osangtsüsang prokshi- nungbo temoatsü tulu angutsü. Okula Subongnuklui anguba aser metetbaji pa atema dang masü saka nüburtem ajak atema timtem terokrong nüksü agi anibelem arema mapa küma inyak. Pa kija tashi agi pur medemer tsüngda, Arogo aser Government level tashi nung kanga tashi itta aser tasü itta angatetdakja senzür külenang ibai tongtibang mapaji kümtet. Ao milen adokdaktsutetba aser Ao Kaketshir Mongdang mezüng Longkhum yimdak tenzüktetba mapa ya atamata mapa ka dangbo masü kangasa tesü mangtsü ka lir .

Pa ya Founder of - Ao students' Conference, Founder of Ao milen, Founder of Kohima Baptist Church 1939, mezüngbuba mendenbuba Ao students' confererence, Ao Tribal Council chairman 1945-1953, NNC member, Mokokchung nung mezüng newspaper regularsa agir Imkongmeren Longkhum tena dang liasü. Idangji newspaperji Nagachari nungi tetsüng agi belentepa atudang hopta ka sülenang paperji angu.

Langpangkong nunger itemi Changtongya nung meeting mena lemtetba onüktem. 1. Arishingang - chairman (Chuchuyimlang) 2.Pongenmeren - secretary (Merangkong) 3. Limangazuk member (Mongsenyimti) 4. Rebalemba -member (Akhoya) 5. Takujungba -member (Merangkong)

(Maneni taruba adok nung...)

Iba Olemsabang nung lemsaba ken-o aser shisatsü ya iba ocet zülur-i bilemba ken-o ama tazünger-i angateta agitsü mepishir

OLONG PAITEP # 4420

1		2		3		4			5	
						6				
7			8					9		
					10					
			11							
	12									13
14						15		16		
				17						
18										
						19				

TIPIEN

- 1. Alima nung telemsa - (5)
- 6. Aor sobaliba oset ka - (5)
- 7. Temadok - (5)
- 9. A _ _ _ _ tsü - (4)
- 11. Kibur ka tenzüker - (5)
- 14. Teka-i tashi am - (4)
- 15. Teni nungi ola adok - (5)
- 18. Talang nung masü - (5)
- 19. Reprang - (5)

LANGTSÜNGLEN

- 1. Ozü akaba oset - (5)
- 2. Ninang tulu - (4)
- 3. Lungku / Tekirak - (4)
- 4. Lemzük - (3)
- 5. O tetenzük - (5)
- 8. Mesaklok - (5)
- 9. Ungken ama - (5)
- 10. Nü den tantsü - (3)
- 12. Süia ao - (5)
- 13. Sapu - (5)
- 15. Mi jangroba anen - (4)
- 16. Nükjidong - (4)
- 17. Ishika - (3)

OLONG PAITEP # 4419 TELANGZÜBA

TIPIEN :

- 1. Yagi, 5. Atamata, 6. Atala,
- 8. Asang, 11. Benjung, 12. Kinük,
- 14. Asüng, 16. Nüngjem, 17. Arok.

LANGTSÜNGLEN :

- 2. Amet, 3. Tasa, 4. Sangpang,
- 6. Asetkong, 7. Aiben, 9. Angsü,
- 10. Aju, 13. Kija, 15. Naro

ALOKBA O SOPANGBA NA OTSÜ ATONGER :

TANÜBO NAI LANGZÜANG

Q: India Defence Secretary tassenba shiba asütsü?

- [A] LC Goyal [B] Sanjay Mitra
- [C] G Mohan Kumar [D] Anant Kumar Singh

(Taruba adok nung onoki langzüsü)

YASHIADOK TELANGZÜBA : MoonJae-in




Tanur asoba anogo nung salem osang den noksa angari adokdaksünüra - Tenüng, Küm, School, Talidak & salem osang tejanga zülur, noksa (photograph - any size) ka den anogo 3 mesüra 4 jela e-mail : tirymyim@gmail.com nung yokang mesüra Tir Yimyim bureau tom nung agüjang.

Tepela Tasoba Anogo



- 1. Tenüng :
- 2. Tasoba anogo:
- 3. Küm : 4. Class :
- 5. School :
- 6. Talidak :
- 7. Salem osang :

NAIA YA METETER MA



Nütsüng 331,778 aliba linük, Iceland nungbo army mali, aser iba linük ya alima nung yimjung aser tesünep aliba linük mezüngbuba jenjang nung lir.

SUDOKU # 3533

		5			
7	6	9	4		
		6		8	4
9	1			4	
6	4	1	5	7	2
	7			6	1
4	2		1		
		2	7	1	9
			8		

TELANGZÜBA # 3532

7	3	6	9	2	5	1	4	8
9	8	4	1	7	6	5	3	2
2	5	1	3	8	4	6	7	9
3	6	2	8	5	1	4	9	7
5	1	7	2	4	9	8	6	3
8	4	9	7	6	3	2	5	1
1	7	5	6	3	2	9	8	4
6	9	8	4	1	7	3	2	5
4	2	3	5	9	8	7	1	6

OJANG LUTEP # 4025

- RMEEMNÜ : □□□□□□□□
- DJENAK : □□□□□□
- SARE : □□□□
- ELSAPASA : □□□□□□□□
- AEKDNJ : □□□□□□
- GAAANJ : □□□□□□
- SIAJAH : □□□□□□
- TAREMLI : □□□□□□□□
- NGMUAEL : □□□□□□□□
- AATSNGWÜSR : □□□□□□□□□□

OJANG LUTEP TELANGZÜBA # 4024

TATIDANG OSANG SANGDONGBA SÜLEN TSÜRABURTEM TEPELA ASER KHURET KÜLEMI ARUR

Anü ita petinu ajanga alima nung tsüingsang mopung melenshidaktsüba ama nisunger tia-a melenshidaktsür ta anü ita petinu tetzürtemi ashir, parnoki ashibaji shidak asü tai'ar nai-a na asoba ita anogo den tanü nü tia medemdangang (Horoscope):



Aries
21/3-19/4

Nai tangar indang khuret asoshi kanga shishia bilemetsür. Saka tanübo na asoshi dang bilem tajungba asütsü.



Taurus
20/4-20/5

Nisung aikati nü sempet tajung ngua, na nungi teyari aginüa arutsü. Nai parnok akhum tsübua amshiang.



Gemini
21/5-20/6

Tanü nai nisung aika yaritsü maongka ajurutsü südi. Nü sempet tajungtiba agi yaritsü merangang.



Cancer
21/6-22/7

Nü mapa nung masü saka nür kinunger mesüra medemer indang taküm nung mangatettep kar nai ajurutsü südi. Nai kümdanga shisa agitsüla.



Leo
23/7-22/8

Nai tajungtiba nung tangar ajungshitsü asoshi renema alitsüla. Saka nü mapa nung temolung tali agütsüba tajungba asütsü.



Virgo
23/8-22/9

Tanü nai mapang indoka na tajungba akümtsü asoshi shisadangtsüla. Mesüra shisa akar nisung kar den nai shisa lemsateptsüla.



Libra
23/9-22/10

Tanü nisung aikati nü teyari aginüa arutsü. Saka nai nungdakba nisung kar dang yaritsü merangang.



Scorpio
23/10-21/11

Tanü nisung aikati nü den sensaksema mapang indoktsü jangratsü. Saka nai menungdakba o tem magizüktsüla.



Sagittarius
22/11-21/12

Tanü nisung aikati nü shisatsü aginütsü. Nisung aikati na akhum tsübur aser nai-a parnok akhum tsübutsüla.



Capricorn
22/12-19/1

Tanü nü mera kanga kümdanga meraba ajanga na lendong aika nungi kümzüktsü. Nü mapa aika lir, aser nai item mapatem nung temolung agüjang.



Aquarius
20/1-18/2


Tanü nai ken o aketba mapa nung shilem magitsüla. Aser iba ajanga nai nü taküm aser na meketa aliba nisungtem tali jangjatsü mapang tajung lir.



Pisces
19/2-20/3

Tanü tangar bilemba nai kanga junga ajitetsü südi. Aser iba ajanga tangari nü teyari meshitsü.

Miley Cyrus-i la kensep nungi mezüing ken 'Malibu' sayaogo



May 12, 2017: Miley Cyrus indang studio kensep trokbuba nungi mezüingbuba ken, 'Malibu' sayaogo, aser kobi melii kensep rangben sayatsü.

Iba ken video ji Miley aser Diane Martel nati direct asü.

Iba ken tekong ka nungbo, 'Sometimes I feel like I'm drowning/ And you're there to save me/ And I wanna thank you with all of my heart' ta lai tena lir.

Oren Yoel-i produce asüba ken ya yashi (May 11, 2017) RCA Records ajanga sayaogo. Tamalen Miley-i, la 'The Voice' nung adentsü atema gari nung

aodang lai iba ken zülu, ta sangdonga liasü.

2015 küm lai 'Miley Cyrus & Her Dead Petz' kensep sayaa liasü, aser iba kenseppi online streaming aser la meyong label Smiley Miley Inc.. ajanga digital download süteta liasü.

La indang tesütiba commercial kenseppibo 2013 küm 'Bangerz' lir, aser iba kensep nung 'Wrecking Ball' aser 'We Can't Stop' ken densema liasü.

Miley-i 'Malibu' ken ya asüing (May 13, 2017) Carson, California, Stub Hub Center nung KIIS FM'er Wango Tango

sentong nung atentsü.

Iba sentong nungsa Katy Perry, Maroon 5, Niall Horan, Backstreet Boys aser Miley teno, Noah Cyrus nungeria shilem agitsü.

Iba ken ya May 21, 2017 nü Billboard Music Awards nung mezüing television ajanga sayutsü.

Maneni lai May 26 nü NBC's Today Show's Summer Concert Series nung aser June ita nung iHeart Media indang iHeartSummer '17 Weekend, Miami Beach nunga iba ken atentsü.

Kelly Clarkson-i The Voice US nung shilem agitsü

May 12, 2017 (Agencies): US indang 'The Voice' season 14 nung coach mapa inyaktsü atema Kelly Clarkson shimogo.

ABC indang 'American Idol' nunga arishi küm 35 tain, Kelly Clarkson ya judge ama shilem agidang nüburtemi kanga sabua liasü. Lai 2002 küm 'American Idol' akok saka la ya NBC indang 'The Voice' US nung ang tongti shilem agitsü asoshi tang ya maparen balala inyaktepba mapang ka lir.

Aser 'Piece by Piece' ken atenlai lar medemer aser US indang 'The Voice' nung coach, Black Shelton dang lai akoktsü, ta shiogo.

"NBC nung 'The Voice' nung shilem agitsü maongka anguba asoshi ni kanga pelar," ta Adam Levine aser Miley Cyrus nung den külemi shilem agütsü alila, Kelly

Clarkson-i ashi.

"Coach mapa inyaktsü asoshi mapang talangka atsütepa aruogo saka mapang metemsüi lia aruogo. Iba show nung ni shisa agütsür ka ama mesüra kentener ka ama shilem agitsü kanga jangrar aser Christmas special nung ni parnok den tesendaktep tajung yangluogo. Kü indang chair meyiba tejak tasen, sempet tajung aketba artist tasentem yaritsü matateter. Kümdanga liang Shelton, ni akoktsü asoshi arur!" ta lai ashi.

'American Idol' nung ang shilem agitsü südi, ta olulu angashir anogo ka majungdang iba osang sangdong.


Kelly-i 'American Idol' akokba sülen iba show ketdangsertemi la iba sentong nung tetendanger mapa inyakdaksütsü jangra liasü.

'Since You've Been Gone' ken atenla ya 'American Idol' nung tetendanger mapa inyaktsü tejangraba meliaka lar telokpurtemi la iba show nung shilem agidaksütsü asoshi mapang lapoktsü, saka iba show ya 2016 küm shibang.

2004 küm 'American Idol' nung 7buba jenjang tongtetla, Jennifer Hudson-a US indang 'The Voice' nung coach mapa inyaktsü shimogo.

Iba osang angashidang tenük nungi nüktzü alu, ta 'Dreamgirls' actress, Hudson-i Instagram nung metetdaksü.

"Tetokteper ka ama shilem agia arur iba amala maongka ngua item menden nung UK nungi arua US nung amentsüa ta shibai bilem! Tsüngremi dang! Saka ni iba maongka ngutetogo!" ta Jennifer-i Instagram nung zülutsü.



Kiev, May 12 : 2017, May 11 anogo Kiev, Ukraine nung aliba International Exhibition Centre nung Eurovision Song Contest 2017 Semi-Final 2 nung Switzerland nungi Timebelle-i "Apollo" ken atenba noksa nung angur.

TAN HOPTA ATEMA - KOMA SÜLA ?

Q. Asenok kibong shia pei peribosa züsentettsüsa ozüing agi alu yimdaksü nunga koma süla ?

Olong 20 shi nung May 12, 2017 tashi nung iba telangzüba ya onok dangi

e-mail - tiryimiyim@gmail.com mesüra SMS - 9856121232 / 9436072422 mesüra Tir Yimiyim Facebook account ajanga yokang. Telangzübatemji taruba Hokolbar nü adoktsütsü.

Airtel, Micromax külemi Canvas 2 nung 4G küm ka asoshi angati agütsür



May 12, 2017 (Agencies): Tanü Micromax ajanga sayaba Canvas 2 smartphone nung Bharti Airtel ajanga küm ka asoshi 4G data aser A2A call angati agütsüsü.

"Micromax Canvas 2 nung Airtel nungi Airtel dangi angati tanen maka jembitsü aser data tanen makai amshiba nung taa magitsü aser iba maongka ya Airtel network indang costumer tasen aser tejenpur ajak nem agütsüsü," ta Micromax indang Chief Marketing Officer, Shubhajat Sen-i osangbener dang ashi.

Tanü Micromax indang dual SIM 4G VoLTE aketba Canvas 2 smartphone sayaogo. Iba phone jenjang ya sen 11,999 lir.

Iba smartphone amshirtem nem Airtel ajanga anogoshia 1GB 4G data agütsüsü aser meilongi iba speed tajemba

akümtsü, ta Sen-i ashi.

Canvas 2 smartphone alir nem India nung network mashi den küm ka jembitsü asoshi anogoshia minute 400 melatsü aser hopta shia minute 1,500 jembitettsü.

"Reliance Jio ajanga ita asem angati jembitsü sayadang iba store kima nisung mesemi nokdaka angu. Küm ka asoshi onoki iba maongka agütsüba nung koma asütsüar memetet. Iba sülen ita asem indang offer ya akhi ama kümogo saka küm ka asoshi maongka agütsüba anu shinga-ia mangu," ta Micromax Informatics co-founder, Rahul Sharma-i ashi.

Retail store tem nung ayoktsü asoshi tanü nungi Canvas 2 bener aru tenzükogo.

"Taruba hopta tatemlen iba phone ya linük nung shishilembadak shilem 40-60

nung angütsü. Corning Gorilla Glass 5 keter aliba phone India nung ibai mezüngbuba lir. Diwali mapang tashi nung Canvas 2 ya tajemba agi million 1 India-i bener marura onok melatsü," ta Sen-isa ashi.

Micromax Canvas 2 ya offline retail channel ajanga dang ayoktsü.

Iba phone nung Android Nougat lir aser MediaTek quad core chipset keta lir. Canvas 2 indang battery ya 3,050 mAh lir aser ghonda 11 tashi jembitsü akoktsü. Iba smartphone nung 3GB RAM, internal storage 16GB aser memory card ajanga 64GB tashi inoka amshitetsü.

"Offline ajanga alirtemi maongka tali akinür, anungji onoki iba phone offline nung dang ayoktsü. Iba phone indang screen melentsü asoshi maongka küm ka agütsüsü aser iba phone melentsü anogo 30 agütsüsü," ta Sen-isa ashi.

Nüburtemi smartphone jenjang sen 10,000-15,000 tsüngta aliba nung rangloker Micromax-i küm ka tsüngta nung smartphone 15 sayatsü sentong lir, ta Sharma-i ashi.

Ranbir aser Katrina nati senteper 'Jagga Jasoos' film ajungkettsüsü



New Delhi, May 12 (Agencies): Ranbir Kapoor aser Katrina Kaif nati tongti shilem agiba film, 'Jagga Jasoos' kobi melii sayatsü, aser iba film ya tenapronglai ajungkettsüsü, ta osang angazüker.

Tamalen Ranbir o Katrina na meimtepa liasü, ajisüaka tena pilaba ajanga tena sabur aika melung raksadaktsü, iba sülena 'Jagga Jasoos' film talangka mesayaba ajanga tena sapurtem

osang tajung kaji, tenati senteper iba film ajungkettsüsü.

Pinkvilla.com osang ajanga ashiba agi, tetsükdaktsü kar ajuruba sülen tang tesüsa iba film ajungkettsüsü aser iba nungji shilem agitsü atema actor anapronglai molungogo.

Katrina aser Ranbir nati yimti aika sema iba film ajungketja jajatsü, ta osang tejangja angazükogo.

Iba film ya taküm July 14 nü tezüdanga atatepdar, ajisüaka sayatsü.

Femina Miss India final nung Kaheli Chophy-i Nagaland tenüng nung shilem agitsü



May 12, 2017: Hokolbarnü Dream Café, Kohima nung osangbenertem senden ka nung Femina Miss India Nagaland 2017, Kaheli Chophy-i noksa tangokdaksüba noksa nung angur.

shilem agitsü renema lir.

Iba show ya Colours TV nung sayatsü.

Nagaland nungi Femina Miss India nung shilem agir ya Akuonuo Khezhe sülenbo Chophy ya lir. Guwahati, Assam nung March 19 nung Femina Miss India atema shimba mapang la ya Femina Miss India Nagaland 2017 shimtet.

Mumbai nung Femina Miss India 2017 nung tokteper parnok 29 den tokteptsü asoshi Kaheli ya May 25-nü abusotsü.

Femina ya Times of India Group indang lir aser India nung state ajunga nungi kasa shilem agitsü asoshi state shia nungi kaka shimteta liasü.

Dream Café, Kohima nung osangbener den jembidang Nagaland tenüng nung national level nung shilem agitsü maongka agütsüba asoshi Tsüngrem aser Beauty & Aesthetic Society of Nagaland (BASN) dang kanga pelar ta lai ashi.

Audition mapang aser la shimtetba mapang bilemteta jembidang, "Kolkata nung March 29 anogo iba korang semtsüba sentong nung tetokteper ajak nem mapa tulu asem-sem lemezüksü," ta Chophy-i ashi.

"Mezüngbuba mapa ji Gateways of Nagaland nung tetsütebu mapang nungi amshia aruba yimsü, sobaliba aser chiyongtsü sayatsü. Tanabuba mapa 'beauty with a purpose' nung kaket reju ajunga aser meta talang nung aliba

yimtsüngtem sema jajatsü liasü. Tasembuba mapa ya 'national costume' lir aser iba nung BASN ajanga designer anepalutsü saka iba mapa tang tashi metemteti inyaktar," ta lai ashi.

"Sorkar aser nüburtem nungi teyari peria mongutetba ajanga iba mapa kera metenzüket," ta Chophy-i ashi.

Mizoram nung la ama kasa contestant bo teyari lenmang balala nungi angu, saka Naga nungeri 'beauty pageant' kangabo meyarir anungji iba yimya melenshia nüburtemi yaria, sarasatemsütsüla, ta lai Naga nungertem ayongzükba o shisem.

"India tesem balala nungi sempet balala aketer aser teyakyak tetsürtem den tetokteptsü ya kanga tesashi aser tasak asütsü saka ni iba konang tulu angateta ni akokba tashi tajungtiba nung shilem agitsü," ta Chophy-i nangzük.

Femina Miss India Nagaland 2017, Kaheli Chophy indang 'vital statistics' ya 33-26-35 aser tar feet 5.6½ lir. La ya Shillong nung aliba St. Peter's College nungi Political Science nung Post Graduate lir.

Social media nung ajemdaker 'Miss Multimedia' shimtsü, anungji Nagaland nung aliba nüburtemi la indang Instagram, Twitter aser Facebook nung 'follow' asütsü asoshi mepishia ashi. Item social media nunga la indang account tenüng Kaheli Chophy alitsü.

Justin Bieber-i Mumbai concert nung pa sapurtem ashiokja ken aten



Mumbai, May 12 (Agencies): May 10 aonung Mumbai nung Canada nunger nungtuagu kentener, Justin Bieber kenten sentong ajanga aika peladaktsüogo, ajisüaka ano nisung aikati, pai yazü nung dang tebangmechi aküpshia ken aten (lip-syncing), ta aitsür.

Mumbai kenten sentong nung India nunger linük tesem balala nungi nisung 45,000 shi adenshia liasü, saka anibelem, tatsük den sen aika indoka ticket aliaka pai ken karbo shidakba nung meteni tebangmechi dang aküpshia, ta shia aika tezüdangteper.

Osang angazükba agi, iba aonungji pai ken 12 shibo maten saka tebangmechi dang aküpshia.

Iba concert nung US sen million 4 shi indok; International jenjang nung kentener ka ama pai kenten sentong tayongertem dang takhangba akia liasü, iba den külemi pa sapurtem ticket nung sen 5,000 nungi sen

15,000 tashi indokogo.

Iba dak sendakba nung kentener, Leon Saalis de Souza-i, "Justin Bieber, yimlibilema India nung kenten sentong tagi. Fireworks dak alaka iba sentong ya majung liasü. Iba ama sentong ka atema onoki ita pezü ataa liasü," ta ashi.

Ano kentener, Sona Mohapatra-ia, "Tembaba jenjang amadokang, onok sen agir onok mezüngmeshi tesü," ta ashi.

Ano taküm February ita nungi pa kenten sentong yongyaa atar nisung ka tenüng agi, Amit Sarkar-i, "Pai [Justin] pa indang CD nungi atener amai liasü. Pai yamai inyaktsü ta ni mebilem. Item kenji pai atener masü ta tejangja," ta ashi.

Ano tetsür ka tenüng agi Tina Joshi-i, "Kanga lemyiba agi asütsüa akok. Pai yamai shilem agiba ngua mepelar. Pai jungdak (live) atentsü ta bilem, saka kü indang 'play list' nung aliba pa kentem angar ama dang liasü," ta ashi.

Taruba nungibo election ajak nung VVPATs amshitsü: EC



New Delhi, May 12, 2017: Hokolbarnü New Delhi nung Election Commission-i party ajak nungi züngsemtem ayongba senden nung Chief Election Commissioner, Nasim Zaidi den Election Commissioner ana- A K Joti aser OP Rawat nungeri anir senden amenba abelen noksa nung angur. Ajchilen noksa nung EVMs aser VVPAT amshia sayuba noksa nung angur.

New Delhi, May 12 (Agencies): Election ajak nung Voter Verifiable Paper Audit Trail (VVPAT) keta aliba Electronic Voting Machines (EVMs) amshitsü atema takhangba agütsüba agizüka tanü Election Commission of India (ECI)-i, item oset alitsü atema senotsü nguogo, aser 2019 General Elections tashi nungbo item machine amshitsü, ta metetdaksü.

Osang angazükba agi, Election Commission-i taküm August ita nungi sangküm September ita tashi nung VVPATs ajak angutsü.

Election Commission-isa, 2019 küm Lok Sabha election nunga VVPAT amshitsü, ta metetdaksü.

Tanü Election Commission-i EVMs onük nung party ajak nungi züngsemtem ayonga senden ka amen.

Election Commission-i National party tenet aser state yimtenren party 48 nung Tirtem nem EVMs aser VVPAT indang temetetsü ka agütsüogo.

Taoba ita opposition party 16-i Election Commission dang akhidang ama paper ballot amshitsüla, kechiyong EVMs nung tamang mekateter, ta shia liasü.

Ajisüaka Election Commission-ibo, EVM ji raksaa amshitetsü makok, ta ashi.

Election Commission-i taruba nungibo election ajak nung EVMs nung VVPAT units keta amshitsü aser election maparen nung nüburtemi tamang katetsü, ta ashi.

Election Commission-i mepishiba nung ajemdaker Union Cabinet-i VVPATs lakh 16 alitsü atema sen crore 3,200 jungnüa lezmüksüogo.

Mongolbarnü Delhi Assembly election nung Aam Aadmi Party (AAP)-i EVMs

koma raksaa amshitetsü, ibaji sayua liasü.

Ibaji anema Election Commission-i, AAP-i raksaa amshia sayuba machine ji EVM mesüka lir, aser ibaji raksaa amshitetsüsa yanglu, ta ashi.

Delhi Assembly nung AAP MLA, Saurabh Bharadwaj-i EVM nungji party balala shia nem vote anana agütsü, ajisüaka vote azüngdangbo vote karbo tanga party dangi oor liasü.

Onoki mepishiba EC-i magizük: AAP

Tanü Election Commission-i party ajak nungi züngsemtem ayongba senden nung AAP nungia Delhi Deputy Chief Minister, Manish Sisodia aser AAP MLA Saurabh Bhardwaj na dena liasü.

EVM onük nungbo opposition lenir party ji AAP lir, aser parnoki, AAP-i 'EVM hackathon' ayongzükang ta onoki mepishiogo, ajisüaka EC-i magizük, ta aitsü.

Sisodia-i twitter ajanga, hackathon ayongtsü atema mepishiba Election Commission-i magizük, ta metetdaksü.

Tesüiba election mapang nung amshiba EVM tem raksaa amshio, ta kuli sayutsü atema Election Commission dang item EVM ji meshi, saka parnoki magütsü, ta paisa ashi.

Tanü iba senden tagidak mapang kima osangbenertem den jembidang AAP MLA, Saurabh Bhardwaj-i, iba senden nung onük tasen kecha mejembir, ta ashi.

Paisa, "Parnoki parnok meyong EVM ji onok nem magütsür, ajisüaka EVM raksaa amshia sayutsü atema parnoki jazüker. Election Commission ya kanga tesangra," ta ashi.

Ano külen senden nung CPI national secretary, Atul Anjan-ia, "Kechiba anüdoklen aliba terenlok linüktemi EVMs mamshir?" ta asüngdanga liasü.

Yashia AAP-i Election Commission dang, tawa agiba assembly election tem nung EVM raksaa amshir asü mamshi'ar ibaji jangjatsü atema Election Commission kübok party ajak nungi züngsemtemi akumba committee ka tentetsü, atema takhangba agüja liasü.

UP sorkari anogo 40 tsüngda gari lenmang nung ongken yanglumatsü

New Delhi, May 12 (Agencies): Uttar Pradesh sorkari anogo 40 nü tsüngda nungsa gari lenmang 11,107 nung ongken aliba ajak yanglumatsü atema atemzükogo, aser iba atemaji Chief Minister, Yogi Adityanath-i aniba sorkari sen crore 1,400 lezmüksüogo.

State sorkari May 6 nü iba mapa atema senji lezmükja liasü, aser mapaji tzunglu aru metenzükang June 15 tashi nungbosa tembanga inyaksü atemzükogo.

Lucknow yimti aser iba kübok aliba district tem nung gari lenmang 1,632 tashi nung ongken aika lir. Iba sülen

Faizabad, Allahabad, Azamgarh, Agra aser Gorakhpur kübok tesemtem nunga gari lenmang aika nung ongken lir.

UP Public Works Department-i ita ka shia mapang agia item lenmang asadanga liasü, aser gari lenmang kilometer 85,943 nung ongken aliba bushitet.

Iba dak sendakba nung Chief Minister-i lenmang yangluba oset tajung dang amshitsü aser lokti lenirtemi tenük kuli lia gari lenmang yanglubaji video tangoktsü tetuyuba agütsüogo.

Iba dak alia CM den tanga minister temia mapangshia ajungbena gari lenmang yanglubaji mita semdangtsü.



New Delhi, May 12, 2017: Hokolbarnü Rashtrapati Bhavan, New Delhi nung International Nurses Day anogomung amungdang Tir, Pranab Mukherjee-i Shri Vinoba Bhave Civil Hospital Silvasa, Dadra & Nagar Haveli nungi nurse, Lalpekmawii nem National Florence Nightingale Award agütsüba noksa nung angur.

Sri Lankayangerba nung India-i yaritsü: PM Modi

Colombo (Sri Lanka), May 12 (Agencies): Tanü Ato kilonser, Narendra Modi-i Sri Lanka dang, ner linük yangerba nung India-i yaritsü; New Delhi ji nenok tembar aser partner ka asütsü, ta metetdaksü.

Tanü Sri Lanka yimtiba, Colombo nung Buddhist nungeri tongti benjung, International Vesak Day sentong nung jembidang Modi-i, "Asen tesem nungi alima nem Buddha aser pa tesayubatem sempet agütsüogo," ta ashi.

Modi-isa, India aser Sri Lanka na tesendaktep tajungba akumtsü atema tang maongka lir, ta metetdaksü.

"Kidanger ama lenla aika nung asenok tesendaktep lir," ta pai ashi.

"Nenoki India ji, ner linük yangerba nungiter tembar ka aser

partner ka ta jangjatsü," ta paisa shisem.

"India maneni ainba ajanga tesem (South Asia linüktem) ajak ajangzüksü, talisa Sri Lanka ajangzüksü," ta pai ashi.

Tesülen Sri Lankan tea industry nung inyaker Tamil nungeri den jembidang Modi-i, Central Lanka nung Tamil nungeri taküm jenjang ajungkettsütsü atema Sri Lanka-i agiba mera ajak nung India-i nungittsü," ta ashi.

Tanü Modi-isa Sri Lankan kübok Nuwara Eliya district nung Hatton Dickoya Base Hospital semzükja liasü. Iba hospital yanglutsü atema India-i senotsü agi yaria liasü.

Yipten 150 aliba multi-specialty hospital yanglutsü atema India sorkari sen billion 1.2 shi agüja liasü.



Colombo, May 12, 2017: Hokolbarnü Sri Lanka yimtiba, Colombo nung India Ato kilonser, Narendra Modi, Democratic Socialist Republic of Sri Lanka Tir, Maithripala Sirisena aser Democratic Socialist Republic of Sri Lanka Ato kilonser, Ranil Wickremesing nungeri International Vesak Day sentong nung adentsü aruba noksa nung angur.

